

UNIVERZITET U TUZLI
Upravni odbor
Broj: 04-6742-1-2/23
Tuzla, 22.11.2023. godine

Na osnovu člana 51. tačka s) Zakona o visokom obrazovanju-prečišćeni tekst („Službene novine Tuzlanskog kantona“, broj: 21/21, 22/21, 5/22, 11/22 i 16/22), člana 50. stav (1) tačka e) Statuta JU Univerzitet u Tuzli, a u vezi sa članom 17. Zakona o javnim nabavkama („Službeni glasnik BiH“, broj: 39/14 i 59/22), na prijedlog Rektorice Univerziteta, Upravni odbor Univerziteta u Tuzli na sjednici održanoj 22.11.2023. godine, donio je

ODLUKU
o izmjenama i dopunama Odluke o usvajanju Plana nabavki
Univerziteta u Tuzli za 2023. godinu

I

U tački I Odluke o usvajanju Plana nabavki Univerziteta u Tuzli za 2023. godinu broj: 04-422-1-2/23 od 26.01.2023. godine, broj: 04-422-1-2/23 od 15.03.2023. godine, broj: 04-2335-1-2/23 od 26.04.2023. godine, broj: 04-2902-1-2/23 od 29.05.2023. godine, broj: 04-3507-1-2/23 od 21.06.2023. godine, broj: 04-3947-1-3/23 od 13.07.2023. godine, broj: 04-4966-1-1/23 od 18.07.2023. godine i broj: 04-6102-1-4/23 od 02.11.2023. godine vrši se izmjena i dopuna koja je prikazana u tabelarnim pregledima koji je sastavni dio ovog Prijedloga Odluke.

II

Ukupan zbir u tabeli I kolona 6. (Vlastiti prihodi), i kolona 8. (Ukupno) mijenja se i glasi: 4.236.275,60 (kolona 6) i 7.115.769,60 (kolona 8).
Ukupan zbir u tabeli II Ekonomski fakultet kolona 5. (Vlastiti prihodi) i kolona 7. (Ukupno) mijenja se i glasi: 55.979,00 (kolona 5) 56.628,00 (kolona 7).

III

U ostalom dijelu Odluka o usvajanju Plana nabavki Univerziteta u Tuzli za 2023. godinu, ostaje nepromijenjena.

Obrazloženje

Rektorica Univerziteta u Tuzli je dostavila Upravnom odboru Prijedlog broj: 01-6739-3/23 od 17.05.2023. godine, za izmjene i dopune Odluke o usvajanju Plana nabavki Univerziteta u Tuzli za 2023. godinu. U obrazloženju prijedloga Odluke je navedeno da je iz Odjeljenja javnih nabavki i investicija dostavljen zahtjev za izmjenu i dopunu Plana nabavki u kojem je obrazloženo da u skladu sa Odlukom Upravnog odbora broj: 04-840-1-2/23 od 13.02.2023. godine o usvojenom rashodovanju stalnih sredstava Univerziteta u Tuzli i Odlukom o odobravanju uništenja tih rashodovanih stalnih sredstava broj: 09-5449-1/23 od 04.10.2023. godine je potrebno da se rashodovana sredstva odvezu sa Univerziteta i propisno unište. Okvirna ponuda koja je dobijena za odvoz i zbrinjavanje rashodovanih sredstava za cca 13 tura odvoza i izdavanje potvrde o uništenju je 1.683,69 KM, a stvarna cijena će se utvrditi nakon završetka radova i evidentiranog broja odrađenih tura iz sprovednih listova, što znači da može biti manje ili više tura. U skladu sa navedenim izvršena je dopuna Plana nabavki za 2023. godinu na ekonomskom kodu 6133 stavkom pod nazivom „*Odvoz i uništenje rashodovanih stalnih sredstava i sitnog inventara sa Univerziteta u Tuzli*“ u iznosu od 2.000,00 KM bez PDV-a (Vlastiti prihodi).

Na ekonomskom kodu 6139 pod rednim brojem 80. planirana sredstva za *Usluge štampanih medija* u iznosu od 6.000,00 KM bez PDV-a su u većoj mjeri realizovana (ostalo 800,00 KM bez PDV-a). Obzirom da do kraja godine ostaje više od mjesec dana, postoji mogućnost za dodatnim objavljivanjem Konkursa, tekstova licitacije i drugog u dnevnim novinama te je neophodno da se

ponovo sprovede procedura javnih nabavki u skladu sa Zakonom o javnim nabavkama. Zakonom o izmjenama i dopunama Zakona o javnim nabavkama BiH („Službeni glasnik BiH“, broj: 9/22) , a koji je na snazi od 10.12.2022.godine, dozvoljava da se istovrsna nabavka može izvršiti putem više direktnih sporazuma, s tim da zbir više direktnih sporazuma za istovrsne nabavke ne smije preći iznos od 10.000,00 KM bez PDV-a na godišnjem nivou te je uvažavajući navedene odredbe izvršena dopuna Plana nabavki za 2023. godinu za novu stavku pod nazivom „Usluge štampanih medija“ u iznosu od 1.000,00 KM bez PDV-a (Vlastiti prihodi).

Na ekonomskom kodu 6139 pod rednim brojem 82. *Usluge hotelskog smještaja gostujućih profesora i gostiju Univerziteta u Tuzli* planirano je 20.000,00 KM bez PDV-a i veći dio je realizovano (ostalo oko 500,00 KM bez PDV-a). Uzimajući u obzir da je u toku redovna nastava u zimskom semestru, da imamo još više od mjesec u ovoj godini, da je mjesečni prosjek broja noćenja oko 40 i da je cijena noćenja 70,00 KM, do kraja godine preostali iznos neće biti dovoljan. Takođe, bliži se i manifestacija svečanog obilježavanja godišnjice Univerziteta u Tuzli, gdje takođe možemo očekivati i dodatni broj gostiju. U skladu sa navedenim izvršena je dopuna Plana nabavki za 2023. godinu za novu stavku pod nazivom *Usluge hotelskog smještaja gostujućih profesora i gostiju Univerziteta u Tuzli* u iznosu od 7.000,00 KM (Vlastiti prihodi).

Na stavci pod rednim brojem 90. *Ugostiteljske usluge*, planirano je 10.500,00 KM bez PDV-a iz vlastitih sredstava. Obzirom da je do kraja godine ostalo neutrošeno 1.259 KM bez PDV-a, te u predstojećem periodu slijedi godišnjica Univerziteta i razne svečane aktivnosti uz godišnjicu, u skladu sa prijedlogom izvršena je dopuna Plana nabavki za 2023. godinu za novu stavku pod nazivom *Ugostiteljske usluge* u iznosu od 3.000,00 KM bez PDV-a.

U skladu sa Planom nabavki za 2023.godinu, na kodu 6139 pod rednim brojem 107. planirana sredstva za *Ostale usluge* u iznosu od 4.000,00 KM bez PDV-a su u većoj mjeri realizovana (ostalo oko 40,00 KM bez PDV-a). Obzirom da do kraja godine preostaje više od mjesec dana, i da su planirane svečane aktivnosti izvršena je dopuna Plana nabavki za 2023.godinu za novu stavku pod nazivom *Ostale usluge* za 2.000,00 KM bez PDV-a (Vlastiti prihodi).

Inicijativu za izmjenu Plana nabavki za 2023. godinu dostavljena je 17.11.2023. godine od Prorektora za osiguranje kvaliteta i internu evaluaciju u kojoj je detaljno obrazložena potreba za dopunom Plana nabavki Univerziteta za 2023. godinu a sve u skladu sa Nalogom za poduzimanje mjera u pogledu sigurnosti korisnika zgrade Fakulteta elektrotehnike br. 01-4766-3/23 u tekstu kako slijedi:

“Radi sigurnosti korisnika zgrade Fakulteta elektrotehnike (stari dio zgrade) nalaže se privremena zabrana korištenja prostorija ovog dijela zgrade do provođenja neophodnih mjera kojima će se postići potrebna sigurnost boravka.

Prizemlje novog dijela zgrade (aneks zgrade) (prostorije 008, arhiv i portirnica) mogu se koristiti, uz praćenje ponašanja ovog dijela zgrade u smislu otvaranja novih pukotina od strane Službe za tehničke poslove i održavanje.”

Donošenjem predmetnog naloga pokrenute su aktivnosti na izmještanju internet čvorišta (server sobe) Univerziteta u Tuzli, koje je smješteno u prostoriji 13 u prizemlju zgrade Fakulteta elektrotehnike. Kako bi se provela predmetna aktivnost Plan nabavki za 2023. godinu je dopunjen za *Usluge izmještanja internet čvorišta (server sobe) Univerziteta* u iznosu od 5.500,00 KM bez PDV-a (Vlastiti prihodi), zatim je dopunjen *Radovima na instalaciji optičke i elektro opreme u prostoriji do portirnice Medicinskog fakulteta za smještaj internet čvorišta (server sobe) Univerziteta* u iznosu od 5.300,00 KM bez PDV (Vlastiti prihodi) i *Adaptacijom prostorije do portirnice Medicinskog fakulteta za smještaj internet čvorišta (server sobe) Univerziteta* u iznosu 3.500,00 KM bez PDV-a (Vlastiti prihodi).

Nadalje, u novijem dijelu zgrade (aneks zgrade Fakulteta elektrotehnike) uočene su takođe pukotine koje trenutno nisu takvog intenziteta da su potrebne mjere zabrane korištenja. U ovom dijelu zgrade koristi se u prizemlju amfiteatar, arhiva i pomoćne prostorije. Na spratu aneksa zgrade je uprava Fakulteta i određeni broj kancelarija za nastavnike. Obzirom da se navedeni prostor ne može koristiti jer je stepenište kojim se dolazi u ove prostorije u starom dijelu zgrade koji se više ne koristi Plan nabavki za 2023. godinu je dopunjen za stavku *Radovi na izradi i montaži čeličnog stepeništa za potrebe ulaza u aneks zgrade Fakulteta elektrotehnike* u iznosu od 55.000,00 KM bez PDV-a (Vlastiti prihodi).

Izgradnjom stepeništa aktivirao bi se navedeni prostor i u obrazloženju je, između ostalog, navedeno da stepenište u narednim koracima tretmana i korištenja predmetnog objekta omogućava da se u

funkcionalnom smislu odvoji stari dio objekta od novog dijela objekta, što u postupku revitalizacije objekta omogućava odvojeno korištenje oba dijela objekta i eventualno odvojene namjene dijelova objekata te će biti posebno važno sa aspekta korištenja aneksa zgrade za vrijeme revitalizacije starog dijela objekta i isto tako se stari dio objekta može koristiti nesmetano ukoliko se nametne potreba za revitalizacijom aneksa zgrade.

Dekanica Ekonomskog fakulteta je dostavila Zahtjev za izmjenu i dopunu Plana nabavki Univerziteta u kojem su sadržane izmjene i dopune Plana nabavki za organizacionu jedinicu Ekonomski fakultet u svrhu realizacije 8. međunarodne konferencije Ekonomija integracija koja će biti održana 8.12.2023. godine. U skladu sa dostavljenim Zahtjevom izvršene su izmjene i dopune u tabeli II Ekonomski fakultet, tačnije izvršeno je povećanje iznosa na stavci pod rednim brojem 2. (sa 3.000,00 KM na 4.270,00 KM), zatim su uvećane stavke pod rednim brojem 5. (sa 1.500,00 KM na 2.500,00 KM), rednim brojem 8. (sa 5.000,00 na 6.000,00 KM) i umanjjen je iznos na stavci pod rednim brojem 4. za iznos od 2.000,00 KM, tačnije sa 8.000,00 KM na 6.000,00 KM. Zatim je izvršeno prebacivanje iznosa u koloni 6. (primljeni tekući transferi i donacije) sa stavke 10. na stavku 8. u iznosu od 649,00 KM. Rektorica Univerziteta je prihvatila prijedloge i utvrdila Prijedlog za izmjene i dopune Odluke o usvajanju Plana nabavki Univerziteta u Tuzli za 2023. godinu.

Nakon provedene diskusije Upravni odbor je usvojio Prijedlog Rektorice i donio odluku kao u dispozitivu.

DOSTAVLJENO:

- 1x Rektorica
- 1x Prorektor za kvalitet i int.eval.
- 1x v.d Direktora za ekonomske poslove
- 1x Ekonomski fakultet
- Odjeljenje javnih nabavki
- 1x Služba za tehničke poslove
- 1x Evidencija Upravnog odbora

PREDSJEDNIK
UPRAVNOG ODBORA

Semir Ahmetbegović
Dr. sc. Semir Ahmetbegović, vanr.prof.

